

Acquisiziuns publicas

- 1. Participaziun a la Cunvegna interchantunala davart las acquisiziuns publicas (CIAP) dals 15 da november 2019;**
- 2. Lescha introductiva tar la Cunvegna interchantunala davart las acquisiziuns publicas (LitCIAP)**

Rapport explicativ per la consultaziun

avrigl 2021

Cuntegn

1	Survista.....	3
2	La situaziun da partenza	4
2.1	Contextualisaziun giuridica.....	4
2.2	La revisiun da la GPA e las consequenzas per la Svizra	5
2.3	La finamira dal project per ina curvegna interchantunala revedida	6
2.3.1	La realisaziun da la GPA 2012 e l'armonisaziun	6
2.3.2	L'armonisaziun parallela dal dretg da las acquisiziuns naziunal	6
2.3.3	Sclerir e estructurar	6
2.3.4	Flexibilisar e modernisar – engrondir il spazi d'agir	6
2.3.5	Damain lavur administrativa, dapli effizienz per offerentas ed offerents	7
2.4	La realisaziun communabla da la revisiun da la GPA	7
3	La consultaziun tar ils chantuns	8
4	L'Organ interchantunal per las acquisiziuns publicas deliberescha la CIAP 2019.....	8
5	Las pli impurtantas novaziuns ed ils princips relevants da la CIAP 2019.....	9
5.1	Remartga preliminar.....	9
5.2	L'artitgel d'intent	10
5.3	Il scleriment da las noziuns e dal champ d'applicaziun	10
5.4	Acquisiziuns orientadas a la qualitat.....	10
5.5	La persistenza.....	11
5.6	Novs criteris d'agjudicaziun	11
5.7	La submissiun da concessiuns specificas e da la transmissiun da tschertas lavurs publicas.....	11
5.8	La plattafurma da publicaziun communabla da la Confederaziun e dals chantuns	12
5.9	Termins scursanids per accelerar proceduras	13
5.10	Ina meglra protecziun giuridica.....	13
5.11	Mesiras cunter conflicts d'interess, curvegna da concurrenza scumandadas e corrupziun	13
5.12	L'exclusiun, la revocaziun e sancziuns	13
5.13	Novs instruments.....	14
5.13.1	Il dialog	14
5.13.2	Contracts generals.....	15
5.13.3	Aucziuns electronicas	15
5.14	Ulteriuras novaziuns.....	15
6	L'effect per las offerentas ed ils offerents	17
7	L'effect per las incumbensadras ed ils incumbensaders	17
8	L'andament da la procedura da participaziun a la CIAP 2019	17
9	Il sboz da la Lescha introductiva tar la CIAP 2019 (LitCIAP).....	18

9.1	Remartga preliminar.....	18
9.2	En general.....	18
9.3	L'object (art. 1)	19
9.4	Il champ d'applicaziun (art. 2).....	19
9.5	Publicaziuns (art. 3).....	19
9.6	La protecziun giuridica (art. 4)	20
9.7	L'annunzia d'exclusiuns (art. 5)	20
9.8	Disposiziuns executivas (art. 6).....	20
9.9	Ina buna legislaziun.....	21
9.10	Midadas en in auter relasch	22
9.11	L'aboliziun dal dretg vertent.....	22
9.12	Effects finanzials e persunals	22

1 Survista

Il dretg da las acquisiziuns publicas (era numnà dretg da submissiun) reglescha in segment impurtant da l'economia publica svizra. La Confederaziun, ils chantuns e las vischnancas acquistan mintg'onn prestaziuns da construcziun, furniziuns e servetschs en la valur da var 41 milliardas francs (circa 20 pertschient la Confederaziun ed 80 pertschient ils chantuns e las vischnancas). Il dretg sa basa principalmain sin trais pitgas: la Cunvegna OMC davart las acquisiziuns publicas dals 15 d'avrigl 1994 (Government Procurement Agreement, GPA; CS 0.632.231.422) che vegn realisada en il rom dal reglament da las cumpetenzas costituzional sin plaun federal tras la Lescha federala davart las acquisiziuns publicas dals 16 da december 1994 (LAP; CS 172.056.1); la Cunvegna interchantunala davart las acquisiziuns publicas dals 25 da november 1994 / 15 da mars 2001 (CIAP; DG 803.410 e DG 803.510) sin plaun chantunal; la cunvegna bilaterala cun l'UE davart tscherts aspects da las acquisiziuns publicas dals 21 da zercladur 1999 (cunvegna Svizra-UE, CS 0.172.052.68). Sin fundament da la revisiun da la GPA terminada il 2012 èsi necessari d'adattar il dretg naziunal. Il medem mument duai vegnir assimilà tant sco pussaivel e raschunaivel il cuntegn dals reglaments da las acquisiziuns da la Confederaziun e dal Chantun.

A chaschun d'ina radunanza speziala da la Conferenza svizra da las directuras e dals directurs da construcziun, da planisaziun e da l'ambient (CCPA) han ils chantuns approvà unanimamain ils 15 da november 2019 la CIAP revedida (en il sequent CIAP 2019). Qua tras vegn tschentà in ulteriur crap da fundament impurtant per armonisar il dretg da las acquisiziuns en Svizra. Cun la realisaziun aspirada da la CIAP 2019 vegnan unifitgadas anc pli fermamain en cumparegliaziun cun oz las prescripziuns en il dretg da las acquisiziuns chantunal che vegn applitgà en ils chantuns, en las citads ed en las vischnancas. Plinavant gida la CIAP 2019 ad armonisar per gronda part il dretg cun la LAP revedida che reglescha da nov las acquisiziuns da la Confederaziun e ch'è entrada en vigur il 1. da schaner 2021. Las paucas differenzas tranter la CIAP 2019 e la LAP vegnan chaschunadas principalmain tras prescripziuns legalas surordinadas ch'ils chantuns e la Confederaziun ston resguardar en lur legislaziuns. Sin fundament da las prescripziuns da la Lescha federala davart il martgà intern (LMI; CS 943.02) vegnan ils chantuns per exempel ad applitgar vinavant il princip dal lieu d'origin, entant ch'è decisiv per la Confederaziun il princip dal lieu da prestaziun.

Ultra da l'unificaziun dal dretg ha la CIAP 2019 era finamiras politicas, numnadamain da resguardar pli fitg la persistenza ecologica, sociala ed economica en connex cun incumbensas publicas e da rinforzar la concorrenza da la qualitat visavi la concorrenza dal pretsch. Tuttas duas finamiras augmentan las schanzas ch'interpresas svizras survegnan incumbensas. La CIAP 2019 introducescha ultra da quai novas metodos d'acquisiziun e simplifitgescha la pussaivladad d'excluder offerentas ed offerents sco er interprendidras secundaras ed interprendiders secundars che lavuran a moda malfidada u che n'observan betg las prescripziuns. Quai rinforza ina concorrenza fairsa cun las medemas schanzas per tuts. La procedura d'acquisiziun e las valurs minimalas na sa midan da princip betg, ma blers detagls da la procedura vegnan adattads. L'utilisaziun simplifitgada, la trasparenza e la segirezza giuridica empermettan er a las offerentas ed als offerents in potenzial da spargn. L'armonisaziun dals reglaments da las acquisiziuns naziunals e la rimnada da tut las publicaziuns uffizialas sin ina plattafurma da surdada (simap.ch) che vegn gestiunada communablamain da la Confederaziun e dal Chantun dastgass esser in grond avantatg per las offerentas ed ils offerents.


Cun la participaziun dal chantun Grischun a la CIAP 2019 po vegnir garantida, observond las stentas d'armonisaziun, la realisaziun da las determinaziuns da la GPA revedida. Igl è da resguardar ch'ils singuls chantuns pon ubain acceptar ubain refusar il text preschentà da la CIAP 2019. I n'è ni pussaivel da participar cun resalva ni d'adattar il text da la cunvegna. En il chantun Grischun vegn la regenza a suttametter il project – suenter la consultaziun – per raschuns da cumpetenza al Cussegl grond per approvaziun.

Cun la participaziun a la CIAP 2019 è colliada l'aboliziun da la Lescha chantunala da submissiun (Lsub; DG 803.300) da l'onn 2004 e la creaziun d'ina Lescha introductiva tar la Cunvegna interchantunala davart las acquisiziuns publicas (LitCIAP). En vista a l'armonisaziun aspirada dal dretg federal e dal dretg da concordat resta en l'avegnir però mo pauc spazi per prescripziuns materialas chantunalas. Ellas èn perquai limitadas a singulas paucas disposiziuns executivas. La decisiun da participaziun a la CIAP 2019 e la nova LitCIAP èn suttamessas al referendum facultativ.

2 La situaziun da partenza

2.1 Contextualisaziun giuridica

Sco gia explitgà ha il dretg da las acquisiziuns publicas pliras basas, cunzunt la GPA – che vegn realisada en il rom dal reglament da las cumpetenzas costituziunal sin plaun federal tras la LAP e dals chantuns tras la CIAP – e la cunvegna bilaterala Svizra-UE davart tscherts aspects da las acquisiziuns publicas. Plinavant ston ils chantuns e las vischnancas resguardar la LMI che garantisce a las offerentas svizras ed als offerents svizzers sin l'entir territori da la Svizra access liber al martgà cun ils medems dretgs per tuttas e tuts e che prevesa medemamain l'obligaziun da publicitar uffizialmain acquisiziuns publicas e la protecziun giuridica per las offerentas ed ils offerents.



2.2 La revisiun da la GPA e las consequenzas per la Svizra

La Convengna OMC davart las acquisiziuns publicas revedida è vegnida approvada formalmain ils 30 da mars 2012 (GPA 2012) ed è entrada en vigur ils 6 d'avrigl 2014 suenter avoir cuntanschì il quorum necessari da sutscriptiuns dals stadis commembers. Cun la revisiun da la convengna dal 1994 (GPA 1994), a la quala la Svizra participescha cun vigur dapi il 1. da schaner 1996, vegn extendì il champ d'applicaziun, simplifitgà e modernisà il text da la convenziun e reglà il diever da meds electronics. La GPA revedida duai plinavant optimar la trasparenza e governance internaziunala da las acquisiziuns publicas. Ella rinforza il cumbat cunter praticas abusivas, en spezial cunter la corrupziun, ed impedischa conflicts d'interess; a medem temp tegna ella quint dals svilups tecnologics e prevesa la pussaivladad da realisar finamiras ecologicas. Sco la GPA dal 1994 sa funda era la convengna revedida vinavant sin ils princips da la nondiscriminaziun e dal tractament naziunal. Tut ils stadis signataris èn obligads da realisar las midadas da la GPA en il dretg naziunal. Il Cussegl federal ha deponì ils 2 da december 2020 l'instrument d'acceptaziun per la Convengna OMC revedida. Per la Svizra è la GPA 2012 entrada en vigur il 1. da schaner 2021 (<https://www.admin.ch/gov/de/start/dokumentation/medienmitteilungen.msg-id-81430.html>).

Per la Svizra è la revisiun tranter auter impurtanta per rinforzar la concorrenza, sclerir dumondas da submissiun, flexibilisar la procedura d'acquisiziun e s'adattar a las sfidas futuras, p.ex. tar la surdada electronica. Ultra da quai vegn meglierà l'access al martgà per interpresas svizras en ils stadis commembers da la GPA. Quest access extendì munta probablamain ad ulteriuras 80 fin 100 milliardas dollars americans ad onn per l'economia svizra ch'è fitg cumpetitiva e preschenta constantamain gronds surplis en la bilantscha da las prestaziuns e transacziuns.

2.3 La finamira dal project per ina cunvegna interchantunala revedida

2.3.1 La realisaziun da la GPA 2012 e l'armonisaziun

Cun la revisiun proponida duai la GPA 2012 vegnir realisada uschè spert sco pussaivel ed a moda assimilada sco dretg naziunal sin il stgalim federal e chantunal. Las finamiras d'enfin ussa dal sector da las acquisiziuns publicas – l'impundiziun economica dals meds publics, il tractament egal e la nundiscriminaziun da las offerentas e dals offerents, la promoziun da la concorrenza e la trasparenza da las proceduras – restan las medemas. Attenziun speziala drizza il project a las mesiras cunter collusiun e corrupziun ed a la renconuschientscha explicita d'acquisiziuns persistentas.

2.3.2 L'armonisaziun parallela dal dretg da las acquisiziuns naziunal

La realisaziun da la GPA 2012 en il dretg naziunal vegn prendida sco occasiun per armonisar parallelamain ils reglaments da las acquisiziuns tar la Confederaziun ed ils chantuns. Differentas reglamentaziuns ch'èn sa cumprovas fin qua per la Confederaziun, ils chantuns u tuts dus vegnan surpigliadas en il project preschent da la cunvegna. Concernent la protecziun giuridica vegnan proponidas novaziuns cun reglas per gronda part omogenas per la motivaziun e l'avertura da disposiziuns, per raschuns ed objects da recurs unitars e per in termin da recurs unifictà da 20 dis. Per pudair realisar l'armonisaziun cun la Confederaziun vegn la valor minimala per furniziuns auzada da 100'000 sin 150'000 francs en la procedura directa.

2.3.3 Sclerir e estructurar

Las experientschas ed ils svilups dapi l'entrada en vigur da la CIAP e la LAP èn vegnids resguardads tar la revisiun ed han dà impuls prezius per optimar las basas legalas. En il diever practic è per exempel sa mussà che tscherts fatgs ed inqual noziun dovran in'explicaziun.

A basa da la GPA 2012 han ins cumplettà la CIAP resp. la LAP cun definiziuns da noziuns ed adattaziuns terminologicas. Per exempel vegnan scleridas dumondas davart il champ d'applicaziun dal dretg da las acquisiziuns, a las qualas vegniva fin ussa respundi differentamain. La GPA 2012 prevesa ina nova furma en cumparegliaziun cun la GPA 1994. La structura da la LAP e da la CIAP s'orienteschan a la GPA ed al decurs da la procedura da surdada, quai che meglierescha considerablamain la chapibilitad. La nova CIAP consista da 65 artitgels dividids en diesch chapitels e da quatter annexas.

2.3.4 Flexibilisar e modernisar – engrondir il spazi d'agir

La LAP resp. la CIAP vul dar in spazi d'agir uschè grond sco pussaivel tant a las incumbensadras ed als incumbensaders dal maun public sco er a las offerentas ed als offerents – cun resalva dals princips dal dretg da las acquisiziuns – ed il medem mument promover il diever da tecnologias d'infurmaziun modernas en il sector da las acquisiziuns publicas. Materialmain pertutgan las midadas proponidas da la CIAP resp. da la LAP en spezial l'introducziun d'instruments d'acquisiziun flexibels che pussibiliteschan da l'autra vart da crear soluziuns innovativas. Uschia vul ins crear in spazi d'agir uschè grond sco pussaivel per svilups futurs, per exempel per acquistar servetschs intellectuels. I vegnan ussa francads per la Confederaziun sin plaun legislativ resp. per ils chantuns en la CIAP ils instruments previs per la Confederaziun dapi il 2010 sco per exempel acquisiziuns consecutivas, dentant er il dialog tranter persunas incumbensadras ed offerentas ed offerents e la pussaivladad da far contracts generals (cun uschenumnadas proceduras d'invista), da la quala i vegn gia fatg diever pli ditg.

Tar la concorrenza efficazia duain en l'avegnir tut las incumbensadras e tut ils incumbensaders dals differents secturs – e betg sco fin qua mo quellas e quels obligadas resp. obligads tenor la cunvegna Svizra-UE – avair la pussaivladad da liberar lur acquisiziuns da la submissiun e da suttametter ellas a la cunvegna resp. a la lescha. Las acquisiziuns publicas d'aventan pli flexiblas grazia a la creaziun d'ina basa legala per aucziuns electronicas ed al novum che pliras incumbensadras e plir incumbensaders occupadas resp. occupads cun in'acquisiziun – ch'èn dad ina vart suttamess a la LAP e da l'autra vart a la CIAP – pon da nov tschermer il dretg (art. 5 CIAP). Analog a quest fatg e per optimar l'utilisaziun da las resursas po vegnir definì en connex cun l'acquisiziun d'infrastructuras naziunalas il dretg da las acquisiziuns applitgabel.

2.3.5 Damain lavur administrativa, dapli efficienza per offerentas ed offerents

L'armonisaziun dals reglaments da las acquisiziuns da Confederaziun e chantuns pussibilitescha a las offerentas ed als offerents da standardisar vinavant lur process d'inoltrar offertas. Els pon quintar cun damain lavur da scleriment, era pervia da la giurisdicziun pli unitara prevista ed ina pli gronda trasparenza da las basas legalas. Tschertas disposiziuns han plinavant la finamira directa da reducir la lavur administrativa per las offerentas ed ils offerents. Uschia pon per exempel ils posts da surdada dumandar las offerentas ed ils offerents pir pli tard en la procedura per las cumprovas en connex cun las cundiziuns da participaziun. Er il diever pli frequent da tecnologias d'infurmaziun modernas en il sector da las acquisiziuns publicas, cunzunt la plattform d'internet communabla da la Confederaziun e dals chantuns (simap.ch), vegn a reducir la lavur administrativa da las offerentas e dals offerents.

2.4 La realisaziun communabla da la revisiun da la GPA

Suenter la terminaziun da la revisiun da la GPA èn la Confederaziun ed ils chantuns sa cunvegnyids da realisar parallelamain las prescripziuns internaziunalas en il rom da lur cumpetenzas respectivas. Sin il stgalim federal e chantunal han ils process da revisiun mintgamai gì lieu separadamain, èn dentant sa basads sin la proposta da reglamentaziun elavurada comunablamain d'ina gruppa da lavur paritetica da la Confederaziun e dals chantuns. Il chantun Grischun è sa participà a questas lavurs ed ha surpiglià la direcziun da las delegaziuns chantunalas. Suenter che las tractativas davart la GPA èn stadas terminadas, ha questa gruppa – da vart da la Confederaziun sut la direcziun da la Conferenza per las acquisiziuns da la Confederaziun (CA) e da vart dals chantuns sut la direcziun da la Conferenza svizra da las directuras e dals directurs da construcziun, da planisaziun e da l'ambient (CCPA) – elavurà il sboz per la LAP revedida e la CIAP revedida.

En connex cun questas lavurs han ins restructurà e modernisà la CIAP e la LAP. Ins ha mantegnì numerus concepts da reglamentaziun ch'èn sa cumprovads ord vista dals chantuns ed integrà per gronda part ed en lur senn en la CIAP 2019 ed en la LAP disposiziuns che vegnan regladas oz en las directives da surdada tar la CIAP (DSAP) (cf. la sinopsa CIAP 2001/CIAP 2019/DSAP en ils documents da consultaziun). Quai ha per consequenza ch'ils chantuns pon desister suenter la participaziun a la CIAP 2019 en il senn da l'armonisaziun dad atgnas disposiziuns executivas voluminusas. Quai vala en spezial per il chantun Grischun che ha surpiglià las DSAP praticamain senza midadas en la Lsub ed en l'Ordinaziun da submissiun vertenta dals 25 da matg 2004 (Osub; DG 803.310).

3 La consultaziun tar ils chantuns

La consultaziun davart il sboz da la CIAP revedida ha gi lieu dals 22 da settember fin ils 19 da december 2014. Sa participads èn tut ils chantuns sco era 58 organisaziuns e persunas singulas. En lur posiziuns han las participantas ed ils participants da la consultaziun fatg valair en spezial lur opiniuns en connex cun la procedura proponida da l'armonisaziun parallela, la concepziun da la protecziun giuridica, il mantegniment dal scumond da contrahar ed il dretg da recurs d'autoritads che la cumissiun da concorrenza CUMCO ha proponì. En ulteriuras reacziuns han las participantas ed ils participants exprimì il giavisch da resguardar pli fitg la persistenza tenor puncts da vista ecologics, socials ed economics.

En il rom da la procedura da consultaziun davart la nova CIAP ha la regenza dal chantun Grischun beneventà las stentas actualas da la Confederaziun e dals chantuns da vulair assimilar uschè lunsch sco pussaivel il cuntegn da lur reglaments da las acquisiziuns mantegnend la repartiziun da cumpetenzas federalistica (conclus da la regenza dals 16 da december 2014, nr. prot. 1197). A l'armonisaziun considerabla dal dretg chantunal da surdada contribueschia plinavant l'integrasiun prevista da las directivas da surdada (DSAP) – che valan oz sulettamain sco recumandaziuns per la legislaziun executiva chantunala – en il dretg da concordat. Uschia daventassan disposiziuns executivas chantunalas (cun excepziun da singulas reglamentaziuns organisatoricas) en futur per gronda part obsoletas. Il Departament da construcziun, traffic e selvicultura (a partir dal 1. d'avrigl 2020: Departament d'infrastructura, energia e mobilitad [DIEM]) ha infurmà la cumissiun per politica statala e strategia dal Cussegl grond en il decurs da la procedura da consultaziun davart las pli impurtantas novaziuns e dumondas da princip sco era davart ils svilups en las acquisiziuns publicas.

Suenter la terminaziun da las proceduras da consultaziun tar la Confederaziun ed ils chantuns han ins repassà il sboz conform a las reacziuns. Suenter ha il Cussegl federal assegnà la fatschenta ils 15 da favrer 2017 al Parlament federal. A partir da quel termin han ils chantuns sistì lur lavurs per pudair garantir l'armonisaziun parallela cun la Confederaziun.

4 L'Organ interchantunal per las acquisiziuns publicas deliberescha la CIAP 2019

Suenter ch'il Cussegl naziunal ed il Cussegl dals chantuns han deliberà en il rom da las votaziuns finalas dals 21 da zercladur 2019 cun differentas adattaziuns la revisiun totala da la Lescha federala davart las acquisiziuns publicas, han ils chantuns stuì examinar tgeninas da quellas midadas che duain vegnir surpigliadas era per la CIAP en vista a l'armonisaziun parallela e nua che ston vegnir mantegnidas differenzas visavi il dretg federal. Il DIEM ha infurmà la Cumissiun per economia e taxas dal Cussegl grond l'avust 2019 davart il stadi dal project da revisiun, las differenzas existentas e l'ulteriur proceder.

Per examinar tge midadas surpigliar resp. tge differenzas mantegnair visavi la LAP han ins realisà ina curta consultaziun en ils chantuns. Suenter han ins fatg las adattaziuns da las disposiziuns, a las qualas almain trais quarts dals chantuns han dà lur consentiment. Davart adattaziuns che n'han betg pudì persvader ina clera maiortad han discutà detagliadamain la radunanza generala da la CCPA ils 19 da settember 2019 e l'assemblea plenara extraordinaria da la CCPA ils 15 da november 2019. Suenter ha l'Organ interchantunal per las acquisiziuns publicas (INAP) decidì davart quellas en ina votaziun. La cunvegna interchantunala preschentada è damai ina cunvegna solida ed elavurada a moda accurata.

Diversas adattaziuns han ins pudì surpigliar senz'auter da la LAP. Ils criteris d'agiudicaziun «differents nivels dals pretschs» e «pretsch segir» ch'il Parlament federal ha integrà en la LAP n'han ins però betg surpiglià. L'INAP è stà da l'avis che quests novs criteris d'agiudicaziun na sajan betg necessaris e che la realisaziun legala e pratica fiss difficila resp. fitg difficila. I n'è betg pussaivel d'accordar els cun la nova cultura da surdada e cun la finamira da simplifitgar il sector da las acquisiziuns publicas uschè lunsch sco pussaivel. Perquai èsi exclus legalmain d'introducir quests criteris en il rom da la legislaziun chantunala davart la participaziun (cf. en quel connex ils fegls cun ils fatgs da la CCPA sut <https://www.bpuk.ch/bpuk/konkordate/faktenblaetter>). Cun il sriver dal 1. da favrer 2021 ha l'INAP renovà questa clera posiziun visavi la regenza dal chantun Grischun sco risposta a sia dumonda explicita en consequenza d'ina incumbensa dal parlament (incumbensa da fracziun PPS concernent la clausula dal nivel dals pretschs/preferenza d'indigens).

5 Las pli impurtantas novaziuns ed ils princips relevants da la CIAP 2019

5.1 Remartga preliminar

La CIAP 2001 vertenta è ina convegno da basa, entant che la CIAP 2019 reglescha per gronda part tut ils secturs dal dretg da las acquisiziuns. En il rom da l'artitgel 63 al. 4 han ils chantuns la pussaivladad da relaschar atgnas disposiziuns executivas regardond las prescripziuns surordinadas. Plinavant possedan ils chantuns vinavant la cumpetenzza d'organisaziun e decidan tgi che ha tge cumpetenzas dal dretg da las acquisiziuns en il chantun.

En general constatesch'ins en emprima lingia che la CIAP 2019 n'ha per consequenza naginas midadas fundamentalas da las acquisiziuns publicas. Schebain che numerus detagls da la procedura vegnan adattads e modernisads, na sa midan la procedura d'acquisiziun, ils tips da procedura e las valurs minimalas da princip betg (cun excepziun che la valur minimala per la procedura d'invit per furniziuns vegn auzada da 100'000 sin 150'000 francs). En il chantun Grischun – che ha sco gia menziunà surpiglià praticamain senza midadas las directivas da surdada da la CCPA tar la CIAP (DSAP) en sia legislaziun da submissiun chantunala – resta il dretg da las acquisiziuns damai quasi il medem. Correspondentamain sto il chantun Grischun mo pli decider paucas reglamentaziuns sin il nivel d'ordinaziun suenter sia participaziun a la CIAP 2019 (p.ex. detagls davart la procedura, la realisaziun, l'organisaziun e la surveglianza).

Ultra da l'armonisaziun e la modernisaziun aspirada ha ella tuttina per consequenza – en spezial per la realisaziun – midadas impurtantas ch'èn resultadas da las finamiras politicas. Cun il nov dretg da las acquisiziuns publicas vul ins rinforzar en spezial la concorrenza da la qualitat e finamiras da persistenza dal dretg da las acquisiziuns e resguardar pli fitg soluziuns innovativas. En la procedura da publicaziun vegn quai ad esser en general in avantatg per las offerentas indigenas ed ils offerents indigens.

Las declaraziuns che suondan servan sco resumaziun explicativa da las pli impurtantas consequenzas e novaziuns che l'introducziun da la CIAP 2019 vegn ad avair per il chantun Grischun.

Per declaraziuns pli detagliadas davart la situaziun da partenza dal project da revisiun ed explicaziuns davart la CIAP 2019 vegn renvià al model dal messadi tar la CIAP revedida da l'INAP (en il sequent: model dal messadi). Quest model dal messadi (incl. il text da la convegno e las annexas 1-4) chatt'ins tar ils documents da consultaziun sin

5.2 L'artitgel d'intent

L'artitgel d'intent na pretenda betg pli mo in diever economic dals meds publics, mabain in diever che resguarda era l'economia publica, l'ecologia e la persistenza sociala (art. 2). Uschia vegnan da nov menziunadas explicitamain tut las trais dimensiuns da la persistenza. Questa cumplettaziun tegna quint da la conscienza augmentada da la societad en connex cun in agir pli persistent.

L'artitgel d'intent serva a l'interpretaziun da las suandantas disposiziuns. La successiun da l'enumeraziun en l'artitgel 2 na signifitga betg che l'emprim princip ha prioritad visavi ils suandants. Tut ils princips pretendan la medema atenziun.

5.3 Il scleriment da las noziuns e dal champ d'applicaziun

La CIAP 2019 cuntegna da nov ina curta glista cun definiziuns (art.3) che cumpiglia tranter auter las noziuns «interpresas publicas» ed «instituziuns dal dretg public». Il champ d'applicaziun subjectiv concernent las incumbensadras ed ils incumbensaders è vegnì precisà (art. 4). Quai che pertutga il champ d'applicaziun objectiv han ins definì la noziun da l'incumbensa publica (art. 8). La delegaziun da lavurs publicas ed il conferiment da concessiuns vegnan tractads uss explicitamain sco incumbensas publicas (art.9). D'ina vart prevesa la CIAP 2019 che la delegaziun d'ina lavur publica u il conferiment d'ina concessiun valan sco incumbensa publica, sche vegnan concedids a l'offerenta u a l'offerent dretgs exclusivs u dretgs spezials en conseguenza d'ina tala delegaziun u d'in tal conferiment ch'ella resp. el exercitescha – directamain u indirectamain – en l'interess public per ina paja u in'indemnisaziun. Resalvadas restan las disposiziuns spezialas dal dretg federal e chantunal. Uschia n'èn per exempel concessiuns en il sector da las ovras idraulicas betg pertutgadas. Las excepziuns (art. 10) èn vegnidas redefinidas ed amplifitgadas. Igl è previs che la cunvegna na vala betg per incumbensas che vegnan surdadas ad instituziuns per personas impedidas, organisaziuns da l'integrasiun en il mund da lavur, instituziuns caritativas e praschuns (art. 10 al 1 lit. e) u ad instituziuns da provediment chantunalas e communalas dal dretg public (art. 10 al. 1 lit. g). Ils chantuns resalvan il dretg da definir per ils dus cas menziunads ina submissiun tenor il dretg da surdada en il rom da las disposiziuns executivas chantunalas (cf. davosvart sut cif. 8.4). Cun cumplettar la giurisdicziun vertenta escluda la CIAP 2019 quatter tips da contracts da las disposiziuns: contracts da monopol, dad instate, dad inhouse e da quasi-inhouse (art. 10 al. 2).

5.4 Acquisiziuns orientadas a la qualidad

La finamira dal nov dretg è da dar dapli paisa a la qualidad. Questa «midada da paradigma», sco quai che differents posts numnan la nova orientaziun, sa manifestescha en differentas disposiziuns dal text da la cunvegna. Il criteri da la qualidad è uschia daventà pli impurtant e vegn mess a pèr cun il pretsch sco criteri da surdada liant (art. 29 al. 1). Per sminuir l'impurtanza da l'aspect economic cun valitar las offertas franchisescha l'artitgel 41 il nov concept da l'offerta «la pli avantagiusa» empè da l'offerta «economicamain la pli favuraivla» che vegniva duvrà fin ussa. Prestaziuns standardisadas pon percenter vegnir surdadas sco fin ussa sulettamain sin basa dal pretsch total il pli favuraivel, la CIAP 2019 pretenda però il medem mument ina pli gronda garanzia dals posts d'acquisiziun che las cundiziuns da participaziun vegnian observadas (tranter auter che l'incumbensadra resp. l'incumbensader sto stringentamain controllar pretschs ch'èn ordvart bass).

L'offerta «la pli avantagiusa» ademplescha il meglier ils criteris d'agiudicaziun, ella è pia l'offerta cun la meglra qualitat totala. Perquai exista en il dretg da las acquisiziuns il dretg da surdar las lavurs a l'offerenta ubain a l'offerent che ha inoltrà l'offerta la pli avantagiusa. Quella vegn eruida cun resguardar ultra da la qualitat ed il pretsch d'ina prestaziun ulteriurs criteris equivalents tut tenor object da prestaziun sco per exempel l'opportunitad, ils termins, ils custs dal ciclus vital, la persistenza, las cundiziuns da furniziun, il servetsch da clientella, etc. (cf. art. 29). Medemamain èsi pussaivel da resguardar finamiras secundaras (sco l'integraziun sociala u plazzas d'emprendissadi en la furmaziun professiunala da basa). Quellas na dastgan però betg avair per consequenza ina discriminaziun u ina refusa nungiustificada da l'access al martgà.

5.5 La persistenza

La persistenza gioga ina rolla impurtanta en la cunvegna revedida. Las disposiziuns correspundentas chatt'ins en ils artitgels 2, 12, 29 e 30. Ils posts da surdada survegnan dapli spazi d'agir per resguardar la persistenza ch'els duessan ussa trair a niz. Quest rinforzament da la persistenza duai e vegn er a marcar pli fitg la concepziun dals criteris en las publicaziuns futuras.

En futur èn ils posts da surdada per exempel obligads da resguardar pli fitg tut ils aspects da la persistenza tenor l'artitgel d'intent, il grad d'innovaziun e la plausibilitad da l'offerta cun stabilir lur systems da valitaziun. Sco agids d'execuziun als stattan a disposiziun ultra dal nov mussavia cuminaivel davart las acquisiziuns e fegliets infurmativs era la plattafurma da las enconuschientschas davart las acquisiziuns publicas persistentas (PAP, <https://www.woeb.swiss/>) creada da la Confederaziun e dals chantuns. Questa plattafurma online serve a persunas interessadas da tut ils stgalims federalistics sco ovra da consultaziun e las sustegna da resguardar la persistenza en lur lavur quotidiana a moda efficazia e sin basa da fatgs technics, scientifics e legals.

Era cun las novas disposiziuns giuridicas èsi dentant scumandà da duvrar la persistenza per finamiras protecziunisticas. En il senn dal tractament egual dastga però vegnir pretendì d'offerentas e d'offerents da la Svizra e da l'exteriur in standard da criteris da persistenza tuttina aut.

5.6 Novs criteris d'agiudicaziun

La CIAP 2019 introducescha da nov la pussaivladad per l'incumbensader public da resguardar tar in'acquisiziun publica uschenumnads criteris «esters a l'agiudicaziun». Ils criteris èn enumerads en l'artitgel 29 al. 2. L'incumbensadra resp. l'incumbensader po supplementarmain resguardar quant enavant che l'offerenta u l'offerent porscha plazzas d'emprendissadi per ina scolaziun da basa, plazzas da lavur per lavurantas e lavurants pli vegls u ina reintegraziun per persunas dischoccupadas da lunga durada. En quel cas sa tracta da criteris socials che pon vegnir applitgads mo per surdadas en il sector dal martgà intern.

5.7 La submitziun da concessiuns specificas e da la transmissiun da tschertas lavurs publicas

Las concessiuns dal dretg administrativ svizzer èn multifaras – /a concessiun na datti betg. La submitziun sut il dretg da las acquisiziuns succeda – sco gia tenor l'artitgel 8 – adina, cura che vegn en dumonda la transmissiun d'ina lavur publica. En la cunvegna vegn la noziun duvrada en il senn ch'ina offerenta privata u in offerent privat survegn cun il conferiment dretgs ch'el n'aveva avant betg. Concessiuns che na stattan betg en connex cun lavurs publicas (p.ex. concessiuns per dievers

spezials) u che na dattan a la concurrenta resp. al concurrent nagins dretgs exclusivs u spezials na vegnan betg registradas.

Sin fundament da resursas limitadas e la concentraziun sin sias cumpetenzas-clav ha il stadi externalisà ad offerentas privatas u offerents privats lavurs publicas en differents secturs e sin tut ils stgalims (Confederaziun, chantuns e vischnancas). Sch'il stadi surdat ina lavur sin fundament d'ina basa legala a terzs, suttastat la transmissiun da questa lavur statala da princip al champ d'applicaziun dal dretg da las acquisiziuns (cf. art. 9). Quai vala tant per il cas che la lavur vegn finanziada directamain da l'incumbensadra resp. da l'incumbensader sco era sch'ella vegn finanziada cun agid da meds d'in fond u d'ina assicuranza.

Cun «lavurs publicas» èn manegiadas las lavurs da tut ils secturs, per ils quals il stadi è responsabel ch'ellas vegnian liquidadas. Quai èn per exempel ils fatgs da polizia, quai vul dir la protecziun da l'urden public e da la segirezza publica sco era la politica da sanadad u la politica sociala. Sch'il stadi sto per exempel tenor lescha procurar per la dismessa da ruments problematic, po el surdar questa lavur a terzs, tant enavant ch'igl exista ina basa legala correspondent.

Ils chantuns e las vischnancas èn obligads da publitgar las lavurs tenor il text da l'artitgel 2 al. 7 LMI. Cun ses focus sin la concorrenza e la rentabilitad na porscha il dretg da las acquisiziuns tar concessiuns da monopol e concessiuns per servetschs publics dentant betg en tut ils cas il rom adattà per conferir concessiuns. Reglas da leschas spezialas han perquai precedenza (p.ex. art. 3a ed art. 5 al. 1 da la Lescha federala davart il provediment d'electricitad [LPrEI; CS 734.7]; art. 60 al. 3bis ed art. 62 al. 2bis da la Lescha federala davart l'utilisaziun da las forzas d'aua [LDA; CS 721.80]; era decrets chantunals pon valair sco reglamentaziuns spezialas).

5.8 La plattafurma da publicaziun comunabla da la Confederaziun e dals chantuns

Il diever da tecnologias d'infurmaziun modernas meglierescha la trasparenza dal sector da las acquisiziuns publicas e simplifitgescha l'access al martgà. Tant en la procedura averta sco er en la procedura selectiva vegnan stringentamain rendidas accessiblas la publicaziun, l'agiudicaziun e l'interrupziun sin la plattafurma per las acquisiziuns publicas che vegn gestiunada comunablamain da la Confederaziun e dals chantuns (oz simap.ch) (art. 48). Plinavant exista er areguard agiudicaziuns directas en il sector dals contracts internaziunals in'obligaziun da publicaziun. Ultra da las incumbensadras publicas resp. dals incumbensaders publics dals chantuns che utiliseschan gia la plattafurma da publicaziuns simap.ch ston en il futur tut las incumbensadras publicas e tut ils incumbensaders publics publitgar lur incumbensas en proceduras avertas e selectivas sin la plattafurma. Ils chantuns pon prescriber ulteriurs organs da publicaziun (p.ex. fegl uffizial dal chantun).

Cun far diever pli stedi da las tecnologias d'infurmaziun modernas en il sector da las acquisiziuns publicas, cunzunt da simap.ch, vegn augmentada vinavant la trasparenza da las acquisiziuns publicas e reducida la lavur per las offerentas ed ils offerents. Actualmain vegnan publitgadas sin simap.ch mintg'onnn var 20'000 publicaziuns cun ina valur d'acquisiziun da ca. 17,5 mia. francs. Cun l'obligaziun legala per tut ils posts da surdada suttamess al concordat da publitgar las lavurs sin simap.ch vegn il dumber d'acquisiziuns publitgadas ed il volumen d'agiudicaziuns vinavant a crescer fermamain. Grazia a la pussaivladad d'abunar servetschs da simap.ch survegnan las offerentas ed ils offerents automaticamain tut las publicaziuns ch'èn en lur interess.

5.9 Termins scursanids per accelerar proceduras

Differents termins minimals en la GPA èn vegnids scursanids e surpigliads en il dretg naziunal. En il sector da contracts internaziunals èsi pussaivel da scursanir termins tant en la procedura averta sco en la procedura selectiva (art. 47). Ordaifer il sector dals contracts internaziunals importa il termin per inoltrar offertas per regola almain 20 dis. Quest termin minimal po vegnir sutpassà mo excepziunalmain per martganzia e servetschs standardisads, en mintga cas sto però vegnir observà in termin minimal da tschintg dis (art. 46 al. 4). Observond quest termin minimal da tschintg dis han ils chantuns la pussaivladad da prescriber auters termins.

5.10 Ina meglra protecziun giuridica

Per garantir l'armonisaziun da la Confederaziun ed ils chantuns è il termin per meds legals vegnì prolungà sin 20 dis (art. 56). Per ils chantuns vala oz in termin da recurs da sulettamain diesch dis. En cumparegliaziun cun ils ulteriurs termins da recurs sa mussa quai sco fitg curt.

Per proceduras da recurs dal dretg da las acquisiziuns publicas è sin plaun chantunal vinavant responsabla sulettamain la Dretgira administrativa, sche almain la valur d'incarica cuntanscha la valur minimala decisiva (art. 52). Sche l'istanza da recurs constatescha ina violaziun dal dretg, po ella il medem mument decider davart eventualas pretensiuns d'indemnisaziun (art. 58). Sco fin qua na valan naginas vacanzas da dretgira.

5.11 Mesiras cunter conflicts d'interess, cunvegnas da concorrenza scumandadas e corrupziun

L'element central da la revisiun da la GPA è la meglieraziun da las cundiziuns da basa per la concorrenza. Questa finamira vul ins cuntanscher en emprima lingia cun ina pli gronda trasparenza ed il cumbat consequent cunter la corrupziun – che sfalsifitgescha resp. impedescha la concorrenza. La corrupziun po avair differentas furmas. En il center stat la concessiun e l'acceptaziun d'avantatgs finansials, sin ils quals i na dat nagin dretg legal.

L'artitgel 11 oblighescha ils chantuns da proceder cunter conflicts d'interess, cunvegnas da concorrenza scumandadas e corrupziun. Ils chantuns èn obligads da prender mesiras adattadas. Quai pon els far per exempel cun publitgar a moda activa ed adequata tut las infurmaziuns davart ina procedura da surdada e revelar ils singuls pass da procedura envers las offerentas ed ils offerents, denunziar acts da corrupziun ed auters acts chastiabels, collavurar activamain a l'inquisiziun e la persecuziun penala da corrupziun sco era bloccar, confiscar, incassar e restituir retgavs da fatgs penals, ordinar sancziuns disciplinaras e realisar consequenzas dal dretg da personal, profundar ed applitgar activamain la prevenziun da corrupziun, scolar e perfecziunar ils posts da surdada sco era far diever da prescripziuns da cumportament per in adempliment correct e conform a l'urden da las lavurs da vart da l'incumbensadra resp. l'incumbensader.

5.12 L'exclusiun, la revocaziun e sancziuns

La glista dals motivs d'exclusiun e da revocaziun numnads exemplaricamain vegn structurada ed amplifitgada sistematicamain en la CIAP 2019. L'artitgel 44 cuntegna ina glista betg definitiva d'eventuals motivs. Da nov differenziesch'ins duas categorias: tar l'alineia 1 èn necessarias enconuschientschas segiras per effectuar in'exclusiun, ina revocaziun u in'annullaziun or dad in register uffizial. Ina novaziun centrala è il fatg che l'incumbensadra resp. l'incumbensader po resguardar experientschas negativas fatgas durant incumbensas precedentas ed ils resultats d'ina

examinaziun da la CUMCO (cunvegnas da submissiun, collusiun) (lit. h). Plinavant ha il post da surdada la pussaivladad da betg resguardar persunas che fan in'offerta ch'èn vegnidas exclusas cun vigur legala tenor l'artitgel 45 al. 1 (lit. j). Tar l'alineia 2 tanschan indizis suffizients per pudair excluder in'offerenta u in offerent, stritgar ella u el d'in register u revocar in'agiudicaziun gia decidida. Sche l'exclusiun u la revocaziun sa basa sin in motiv betg enumerà, tanschan indizis suffizients.

Cun l'artitgel 45 èn vegnidas francadas ultra da quai las sancziuns «avertiment», «exclusiun» (enfin tschintg onns) e «multa» (enfin 10 pertschient da la summa d'offerta repassada) en la CIAP revedida. Questas pussaivladads da sancziun han ins surpiglià dal dretg da submissiun dal chantun Grischun (art. 32 Lsub). Da nov vegn dentant menziunada explicitamain la pussaivladad da sancziunar er interpretidras secundaras ed interpretidras secundars. Davart las offerentas resp. ils offerents e las interpretidras secundaras resp. ils interpretidras secundars ch'ins ha sancziunà maina l'INAP da nov ina glista betg publica.

5.13 Novs instruments

La cunvegna revedida vul conceder a las incumbensadras publicas ed als incumbensaders publicos ed a las offerentas ed als offerents – cun resalva dals princips dal dretg da las acquisiziuns publicas – in spazi d'agir uschè grond sco pussaivel ed il medem mument promover il diever da technologies d'infurmaziun modernas en il sector da las acquisiziuns publicas. Materialmain pertutgan las midadas proponidas en spezial l'introducziun d'instruments d'acquisiziun flexibels che pussibiliteschan da l'autra vart da crear soluziuns innovativas. Uschia vul ins crear per svilups futurs, per exempel en il sector da l'acquisiziun da servetschs intellectuals, il spazi d'agir il pli grond pussaivel. Per realisar quai vegnan francads en la CIAP 2019 instruments sco il dialog tranter l'incumbensadra resp. l'incumbensader e l'offerenta resp. l'offerent (art. 24), la pussaivladad da far contracts generals (art. 25) – cun l'uschenumnada procedura d'invista –, da la quala i vegn gia fatg diever pli ditg en la pratica sco era la realisaziun d'aucziuns electronicas (art. 23).

5.13.1 Il dialog

Per incumbensas complexas, servetschs intellectuals u l'acquisiziun da prestaziuns innovativas n'èsi savens betg pussaivel da circumscriber e determinar precis avunda il cuntegn da l'acquisiziun en ina descripziun da la prestaziun gia avant la publicaziun. En quel cas pon ins far diever dal dialog sco instrument en la procedura averta e la procedura selectiva.

En il dialog cun offerentas tschernidas ed offerents tschernids po l'incumbensadra resp. l'incumbensader elavurar eventualas soluziuns u modas da proceder, uschia che duess esser avant maun a la fin dal dialog ina descripziun da la prestaziun che tegna quint commensuradamain tant da las pretensiuns da l'incumbensadra resp. l'incumbensader sco era da las abilitads e capacitads da las offerentas e dals offerents. L'incumbensadra u l'incumbensader posseda uschia in instrument, cun il qual ella u el po sa referir a las enconuschientschas professionalias specificas da las offerentas e dals offerents en in martgà d'acquisiziuns concret e promover innovaziuns. Uschia pon ins evitar l'interruptiun da proceduras e novas publicaziuns. Per las offerentas ed ils offerents ha il dialog l'avantatg ch'els na ston betg concretisar en detagl lur offertas a l'entschatta da la procedura da surdada, mabain pon far quai en in process cuntinuant.

I n'è betg permess da duvrar il dialog per negoziar ils pretschs d'offerta (cf. art. 11 lit. d). En quest connex vegn fatg attent explicitamain al fatg ch'il dialog na dastga betg vegnir manà cun l'intenziun da negoziar pretschs e pretschs totals (art. 24 al. 2).

In exempel per ina tala lavur complexa, per la quala i n'è betg pussaivel da definir ordavant las cundiziuns da basa, è la reutilisaziun d'in giraun industrial cun in diever futur nunenconuschent ed in grond dumber da proprietarias e proprietaris cumpigliads.

5.13.2 Contracts generals

En il rom da contracts generals na vegn betg publitgà in volumen da prestaziun definitiv, mabain il dretg da l'incumbensadra u l'incumbensader da retrair tschertas prestaziuns durant ina perioda definida. Contracts generals vegnan publitgads en spezial per motivs economics, per betg daventar dependent d'in suletta offerenta u d'in sulet offerent u per evitar difficultads cun il providiment. La pussaivladad da far contracts generals n'è betg in'atgna procedura. Ella po vegnir tratga a niz entaifer las proceduras d'acquisiziun existentas. Era sche l'instrument dal contract general signifitga ina tscherta flexibilitad per il post da surdada, pretenda la cunvegna cleramain ch'i vegnia fixà almain la perioda dal contract general ed ils pretschs (maximals). Per survegnir pretschs fidabels sto vegnir definì uschè concretamain e detagliadamain sco pussaivel era l'object da contract.

La cunvegna fa ina differenza tranter il contract general cun in'offerenta tschernida resp. in offerent tschernì (cf. art. 25 al. 4) e quel cun pliras offerentas resp. plirs offerents (cf. art. 25 al. 5). Tar il contract general cun pliras agiudicaziuns vegnan pretendids supplementarmain «motivs suffizients».

5.13.3 Aucziuns electronicas

L'aucziun electronica n'è betg in'atgna procedura da surdada, mabain in instrument che po vegnir applitgà en il rom d'in project d'acquisiziun.

En in'emprima fasa (prequalificaziun) examinescha l'incumbensadra resp. l'incumbensader ils criteris da qualificaziun e las specificaziuns tecnicas e fa in'emprima valitaziun. L'aucziun sco tala succeda pir en in segund pass da procedura. Pliras rundas da valitaziun pon avoir lieu. En quel connex pon las offerentas ed ils offerents modifitgar lur offertas areguard il pretsch u tschertas cumponentas quantifitgables. In sistem automatisà valitescha las offertas modifitgadas e plazzescha correspondentamain da nov las offerentas ed ils offerents.

Las aucziuns electronicas vegnan applitgadas sulettamain per prestaziuns standardisadas. Autras prestaziuns (sco p.ex. servetschs intellectuals) na pon damai betg esser l'object d'ina aucziun electronica. La pratica vegn pir anc a stuair mussar nua che quest nov instrument po vegnir utilisà a moda profitaivla.

5.14 Ulteriuras novaziuns

Ulteriuras novaziuns relevantas da la CIAP 2019 èn en spezial:

- Las pretensiuns d'observar las ordinaziuns da la protecziun da lavur, las cundiziuns da lavur, l'egualitad da las pajas e (da nov explicitamain er) il dretg d'ambient (art. 12) èn formuladas a moda pli concreta. Las offerentas u ils offerents ston adossar las directivas a lur interpretidras secundaras ed a lur interpretidars secundars. Offerentas estras ed offerents esters ston observar a l'exteriur da nov almain cunvegna internaziunalas sin il sector da l'ambient e da la lavur.
- Da nov porscha la CIAP 2019 disposiziuns cleras e precisas davart l'occupaziun preliminar da persunal d'acquisiziun e d'offerentas e d'offerents sco era davart la recusaziun (art. 13 f.).

Plinavant duessi esser pussaivel da realisar analisas dal martgà, senza ch'il causal da l'occupaziun preliminar saja ademplì (art. 14 al. 3).

- Er il catalog dals motivs excepziunals che permettian in'acquisiziun directa sur la valur minimala (art. 21) è vegnì adattà. Incaricas successivas èn da nov permessas directamain, sch'i n'è per motivs economics u technics betg pussaivel da midar l'offerent da prestaziuns per remplazzar, cumplettar u amplifitgar prestaziuns gia furnidas, u sche quai avess per consequenza difficultads considerablas u chaschunass custs supplementars substanzials.
- En la CIAP 2019 n'è betg pli prevesida explicitamain l'avertura da las offertas publica sco quai ch'ella è reglada oz en l'artitgel 23 Lsub. L'artitgel 37 al. 1 da la CIAP prevesa sulettamain che almain duas persunas che represchentan las incumbensadras resp. ils incumbensaders avrian las offertas.
- Suent l'avertura èsi pussaivel da repassar ed adattar las offertas, sche quai è necessari per render cumparablas ellas u pervia da midadas da prestaziun (art. 39). Spiras tractativas da pretschs («rundas da negoziaziun») restan però vinavant scumandadas (art. 11 lit. d). Da nov vala quai era per acquisiziuns da la Confederaziun.
- L'artitgel 38 fa differentas prescripziuns per l'examinaziun da las offertas (per exempel l'obligaziun da scleriment en cas d'offertas ordvart bassas) e per l'andament da l'uschenumnada metoda da duas cuvertas (valitar las offertas en in'emprima fasa senza considerar las cundiziuns finanzialas e resguardar il pretsch pir cun avrir la segunda cuverta).
- Da nov lubescha la CIAP 2019 sut tschertas cundiziuns da restrenscher – en cas d'examinaziuns fitg pretensiusas – la valitaziun detagliada a las trais offertas che paran a maun d'ina emprima examinaziun summarica dals documents (uschenumnada shortlist, art. 40 al. 2) dad esser las meglras.
- Da nov na vegnan las lavurs betg surdadas tenor l'offerta economicamain la pli favuraivla, mabain tenor l'offerta la pli avantagiada (art. 41). Questa reformulaziun han ins surpiglià da la GPA. Tenor las discussiuns parlamentaras duai ella exprimer vers anora la midada da paradigma aspirada da la concorrenza dal pretsch a la concorrenza da la qualidà. Era cun il nov dretg ston las lavurs stringentamain vegnir surdadas a l'offerta che cuntanscha ils pli blers puncts tenor ils criteris d'agiudicaziun – surtut la qualidà, il pretsch ed ulteriurs criteris definids tut tenor object da prestaziun.
- En il sector dals contracts internaziunals ston lavurs surdadas vegnir publitgadas per regola entaifer 30 (empè enfin ussa 72) dis (art. 48 al. 6).
- Da nov ston disposiziuns vegnir motivadas summaricamain per activar il termin per meds legals. La motivaziun summarica da l'agiudicaziun cumpiglia il tip da procedura ed il num da l'offerenta resguardada u da l'offerent resguardà, il pretsch total da l'offerta resguardada, las caracteristicas relevantas ed ils avantatgs decisivs da l'offerta resguardada ed eventualmain ina preschentaziun dals motivs per la surdada directa (art. 51 al. 3).

6 L'effect per las offerentas ed ils offerents

L'armonisaziun dals reglaments da las acquisiziuns da la Confederaziun e dals chantuns pussibilitescha a las offerentas ed als offerents da standardisar vinavant lur process. Els pon quintar cun damain lavur da scleriment, era pervia da la giurisdicziun pli unitara prevista ed ina pli gronda trasparenza da las basas legalas.

Tschertas disposiziuns han plinavant la finamira directa da reducir la lavur administrativa per las offerentas ed ils offerents. Uschia pon per exempel ils posts da surdada dumandar las offerentas ed ils offerents pir pli tard en la procedura per las cumprovas en connex cun las cundiziuns da participaziun (p.ex. ina garanzia da banca, art. 26 al. 3 ed art. 27 al. 3). Er il diever pli frequent da tecnologias d'infurmaziun modernas en il sector da las acquisiziuns publicas, cunzunt la plattafurma d'internet communabla da la Confederaziun e dals chantuns (simap.ch), vegn a reducir la lavur administrativa da las offerentas e dals offerents.

Grazia a la nova orientaziun sco per exempel la concorrenza da qualitat, il resguard da la persistenza e la consideraziun da la forza innovativa d'interpresas pon interpresas pitschnas e mesaunas svizras far ressortir lur fermezzas en connex cun las acquisiziuns publicas.

7 L'effect per las incumbensadras ed ils incumbensaders

Cun la revisiun da la CIAP vegn il rom legal simplifitgà e meglierà. Instruments cumprovads da la pratica sco per exempel la pratica da surdadas inhouse (art. 10 al. 3 lit. c) u ils contracts generals (art. 25) èn vegnids francads en la cunvegna revedida. La collecziun da reglas è per consequenza pli vasta e precisa. Plinavant stattan a disposiziun ad incumbensadras ed incumbensaders ed offerentas ed offerents novs instruments sco aucziuns electronicas (art. 23) u la procedura da dialog (art. 24). Quai augmenta la flexibilitad e promova il diever da tecnologias d'infurmaziun modernas. Ultra da quai èn vegnidas introducidas sancziuns per proceder cunter offerentas ed offerents sco era cunter interprendidras secundaras ed interprendiders secundars. Las disposiziuns dals artitgels 44 e 45 prevesan la pussaivladad da multas fin l'exclusiun da fin tschintg onns da surdadas futuras. En cas simpels po vegnir dà in avertiment. Quai duai garantir che las disposiziuns vertentas che pertutgan la protecziun da lavur, las cundiziuns da lavur, l'egualitad da las pajas e la protecziun da l'ambient vegnan observadas. La valur minimala per furniziuns en proceduras directas è la finala vegnida auzada da 100'000 sin 150'000 francs. Questa novaziun ha l'avantatg che las incumbensadras publicas ed ils incumbensaders publics survegnan dapli spazi d'agir per surdar incumbensas da furniziun pitschnas. En pli vegn questa valur minimala assimilada a las valurs minimalas da las proceduras directas da servetschs e prestaziuns da construcziun (interpresas secundaras da construcziun). Ultra da quai ha lieu in'armonisaziun cun las valurs minimalas da la Confederaziun en il sector da las proceduras directas.

8 L'andament da la procedura da participaziun a la CIAP 2019

Cunvegna interchantunalas èn cunvegna dal dretg public che vegnan fatgas da dus u plirs chantuns concernent in object che fa part da lur sector da cumpetenza. Ils singuls chantuns pon acceptar ubain refusar il text da la CIAP preschentà. I n'è betg pussaivel da sa participar cun resalva. La CIAP 2019 po vegnir messa en vigur, uschespert che dus chantuns suttascrivan ella (art. 65 al. 1 CIAP 2019).

En il chantun Grischun è il project da suttametter al Cussegl grond per l'approvaziun (art. 32 al. 2 Cst. chant.). La conclusiun davart la participaziun a la CIAP ed il relasch da la LitCIAP suttastattan al referendum facultativ (art. 17 al. 1 cif. 1 e 2 Cst. chant.).

Cun la participaziun dal chantun Grischun a la CIAP revedida vegn garantida la realisaziun da las disposiziuns revedidas da la GPA 2012. Il medem mument collavura il chantun a las stentas d'armonisaziun. Sch'il chantun Grischun na sa participescha betg, stat el da la vart e stuess en spezial realisar sez las disposiziuns da la GPA en il dretg chantunal.

Cun il concordat revedì èsi pussaivel d'armonisar praticamain l'entir dretg da las acquisiziuns dals chantuns. En la lescha introductiva ed en l'ordinaziun executiva è necessari mo pli in dumber limità da disposiziuns executivas chantunalas.

Sco fin uss èn da princip las singulas incumbensadras ed ils singuls incumbensaders resp. ils posts da surdada responsabels per la realisaziun da las prescripziuns dal dretg da las acquisiziuns. Il DIEM cun ses center da cumpetenzza per il sector da las acquisiziuns publicas sustegna els. El cusseglia ils posts da surdada, metta a disposiziun models e meds d'agid sco era purschidas da scolaziun e da perfecziunament, surpiglia incumbensas interdisciplinaras e collavura cun la Confederaziun ed ils auters chantuns. El publitgescha las infurmaziuns correspondentas en l'internet sin

<https://www.gr.ch/DE/institutionen/verwaltung/diem/ds/Seiten/home.aspx>.

9 Il sboz da la Lescha introductiva tar la CIAP 2019 (LitCIAP)

9.1 Remartga preliminara

Il sboz da la Lescha introductiva tar la CIAP 2019 (LitCIAP) preschenta s'orientescha en il senn da l'armonisaziun aspirada cun ils auters chantuns al model d'ina lescha da participaziun da la CCPA (vesair documents da consultaziun u sin <https://www.bpuk.ch/bpuk/konkor-date/ivoeb/ivoeb-2019>).

Tenor cif. 4.2.1 da las directivas per la legiferaziun dal chantun Grischun vegn numnada ina lescha che serva directamain a l'introducziun da dretg federal «lescha introductiva» (p.ex. Lescha introductiva tar la Lescha federala davart il traffic sin via, LitLTV). La LitCIAP na serva betg ad introducir dretg federal, ma auter dretg surordinà, numnadamain dretg interchantunal. Ella cuntegna disposiziuns che surpassan la spira participaziun a la CIAP 2019. Quest fatg giustifitgescha la denominaziun lescha introductiva empè lescha da participaziun.

9.2 En general

La participaziun a la Cunvegna interchantunala davart las acquisiziuns publicas dals 15 da november 2019 (CIAP) permetta mo pli paucas disposiziuns chantunalas materialas per cumpletter il dretg da las acquisiziuns. La CIAP 2019 è applitgabla directamain. L'artitgel 63 al. 4 CIAP 2019 permetta als chantuns da relaschar disposiziuns executivas, e quai materialmain tar l'artitgel 10 (excepziuns), artitgel 12 (observaziun da las disposiziuns che pertutgan la protecziun da la lavur, las cundiziuns da lavur, l'egualitad da las pajas ed il dretg da l'ambient) ed artitgel 26 (cundiziuns da participaziun) dal concordat. En auters secturs – cun excepziun da las disposiziuns necessarias per l'execuziun – n'èn betg permessas disposiziuns che divergeschan da la CIAP. Disposiziuns executivas èn normas organisatoricas, executivas u concretisantas.

Ellas ston sa tegnair vi dal rom legal e na dastgan cunzunt betg fixar novas prescripziuns che limiteschan ils dretgs dals adressats u als dicteschan novas obligaziuns. I na fiss per exempel betg permiss da nominar sin la via dal dretg d'execuziun novs criteris d'agiudicaziun generals ed abstracts sco la clausula dal nivel dals pretschs numnada sut cif. 2.5 (cf. expertisa giuridica da walderwyss rechtsanwälte dals 11 da mars 2020 per incumbensa da la CCPA, cif. marg. 94 ss., disponibla sin https://www.bpuk.ch/fileadmin/Dokumente/bpuk/public/de/doku-mentation/berichte-gutachten-konzepte/oeffentliches-beschaffungswesen/DE_Rechtsgutachten_Beruecksichtigung_unterschiedlicher_Preisniveaus.pdf). Ultra da quai èn da reglar en las disposiziuns executivas prescripziuns da procedura formalas e cumpetenzas per l'execuziun e la surveglianza.

9.3 L'object (art. 1)

L'artitgel 1 descriva l'object da reglamentaziun dal decret preschent, numnadamain l'introducziun da la Cunvegna interchantunala davart las acquisiziuns publicas dals 15 da november 2019 (CIAP) en il chantun Grischun.

9.4 Il champ d'applicaziun (art. 2)

L'artitgel 2 extenda il champ d'applicaziun da la cunvegna sin incumbensas surdadas ad organisaziuns che s'occupan da l'integrasiun d'umans en il mund da lavur. Uschia vegn fatg diever da la pussaivladad da determinar ina submissiun da questas incumbensas (cf. explicaziuns en il messadi da model tar l'art. 10 al. 1 lit. e CIAP 2019, p. 37 ss.) en il rom da las disposiziuns executivas (art. 63 al. 4 CIAP 2019).

La submissiun da questas incumbensas corresponda a la pratica da publicaziuns d'enfin ussa dal chantun Grischun e da plirs chantuns da la Svizra tudestga. Plinavant èsi da considerar che las summas da las incumbensas èn per part considerablas (var 650 miu. francs ad onn en Svizra) e ch'i na dat al martgà betg mo instituziuns caritativas, mabain er interpresas da servetschs che han la finamira da far gudogn. L'excepziun generala d'incumbensas surdadas ad organisaziuns da l'integrasiun en il mund da lavur na pon ins betg motivar objectivamain e stess en conflict cun il patratg da rentabilitad anc adina central e cun la trasparenza en il sector da las acquisiziuns publicas.

9.5 Publicaziuns (art. 3)

Tenor l'artitgel 48 al. 1 CIAP 2019 ston incumbensadras ed incumbensaders publitgar lavurs che vegnan surdadas en il sector da contracts internaziunals directamain sin basa d'ina disposiziun excepziunala tenor l'artitgel 21 al. 2 CIAP 2019. La CIAP 2019 surlascha als chantuns, schebain els vulan prescriber questa obligaziun a moda analoga era per il sector da contracts betg internaziunals. Cunquai ch'ina tala obligaziun da publicaziun serva tant a la trasparenza – i sa tracta d'ina excepziun tenor l'artitgel 21 al. 2 CIAP 2019 – sco er a la segirezza giuridica per tut ils participads, duain – sco quai ch'il model da la lescha propona – era vegnir publitgadas en il sector dal martgà naziunal las surdadas directas tenor artitgel 21 al. 2 CIAP 2019.

9.6 La protecziun giuridica (art. 4)

Tenor l'artitgel 52 al. 1 CIAP 2019 èsi pussaivel da recurrer cunter decisiuns da las incumbensadras e dals incumbensaders «davent d'almain la valor d'incarica decisiva» per la procedura d'invit. Ordaifer il sector dals contracts internaziunals pon ils chantuns decider sezs, sch'els vulan ir la via dals meds legals gia davent dad in franc u a basa dal tip da procedura (model dal messadi, p. 95). En il dretg federal vala la protecziun giuridica per prestaziuns da construcziun davent da la valor minimala da la procedura averta u la procedura selectiva e per autras prestaziuns davent da la valor minimala da la procedura d'invit (art. 52 al. 1 LAP 2019).

En il chantun Grischun ha valì fin ussa la protecziun giuridica davent da la procedura d'invit, e quai independentamain da la valor d'incarica concreta. Quella regulaziun è sa cumprovada en il Grischun, perquai che tut ils participads san a partir da l'entschatta da la procedura, sch'igl exista sin fundament da la procedura instradada ina protecziun giuridica per in'offerenta ubain in offerent u betg.

I na para dentant betg adequat d'extender il dretg giuridic era sin proceduras directas ed uschia schizunt sin incumbensas pitschnas. En connex cun acquisiziuns directas sut la valor minimala na sto l'incumbensadra resp. l'incumbensader documentar nagut – pia betg fixar criteris e betg formular u motivar la decisiun da surdada. Per mancanza da documents fiss in'examinaziun giuridica tras la Dretgira administrativa perquai fitg difficila. Era las reprimandas eventualas fissan limitadas fermamain: perquai che la procedura directa sut la valor minimala dat grondas libertads a l'incumbensadra resp. l'incumbensader da tscherner ses partenari da contract, na savess ina recurrenta u in recurrent per exempel betg far valair sbagls d'evaluaziun, mabain sin il pli grevas violaziuns da principals dal dretg da las acquisiziuns (model dal messadi tar art. 21 al. 1 CIAP 2019, p. 55).

9.7 L'annunzia d'exclusiuns (art. 5)

L'artitgel 5 oblighescha l'incumbensadra u l'incumbensader da consegnar al Chantun en cas d'exclusiuns tenor l'artitgel 45 al. 1 CIAP 2019 ina copia da la decisiun cun vigur legala. Il Chantun procura per l'annunzia a l'INAP (art. 45 al. 3 CIAP 2019) e la regenza designescha il post responsabel (DIEM). Gia tenor il dretg vertent è il DIEM incumbensà cun differentas incumbensas executivas en il sector da las acquisiziuns publicas. La CIAP 2019 pussibilitescha da nov en spezial da sancziunar ultra da l'offerenta fallibla e l'offerent fallibel er interpretidras secundaras falliblas ed interpretidras secundars fallibels.

9.8 Disposiziuns executivas (art. 6)

Ils chantuns pon relaschar disposiziuns executivas tar la CIAP 2019 (art. 63 al. 4 CIAP 2019). La cumpetenzza correspundenta vegn transferida sco en il dretg vertent (art. 35 al. 1 Lsub) a la regenza. Quai è giustifitgà, perquai ch'ils detagls da l'organisaziun e da la procedura ch'èn da reglar en quel connex ston eventualmain vegnir adattads spert a novas realitads economicas, politicas u giuridicas. L'ordinaziun correspundenta duai vegnir relaschada il medem mument sco quai che la CIAP 2019 e la LitCIAP 2019 entran en vigur.

L'enumeraziun betg definitiva en l'artitgel 6 dat ina survista dals temas che pon dal punct da vista actual esser l'object da las disposiziuns executivas. Las autorizaziuns cumpiglian en spezial:

- designar ils posts ch'èn responsabels per la realisaziun, las controllas e la surveglianza,

- fixar las modalitads per la procedura electronica (consegnar electronicamain offertas ed avrir disposiziuns),
- prevair organs da publicaziun supplementaras,
- prevair statisticas supplementaras,
- delegar la cumpetenza da communitgar da l'incumbensadra u l'incumbensader davart l'avertura da disposiziuns,
- designar ils posts ch'èn responsabels per la realisaziun, la gestiun da la statistica, las infurmaziuns sco era la scolaziun ed il perfecziunament en il sector da las acquisiziuns publicas,
- prender mesiras da vart da l'incumbensadra u l'incumbensader cunter ristgas sco il cumportament sbaglià d'offerentas e d'offerents u dal persunal d'acquisiziun.

L'ordinaziun da submissiun chantunala vertenta cuntegna per gronda part gia questas autorisaziuns resp. incumbensas. Ina novaziun è percenter l'obligaziun da las incumbensadras e dals incumbensaders integrada en litera h da prender mesiras cunter in eventual cumportament sbaglià d'offerentas e d'offerents u da las personas incumbensadas cun acquisiziuns che sa resulta da l'artitgel 11 lit. b CIAP 2019 (cf. executiuns precedentas sut cif. 4.11). Cun agid da mesiras da prevenziun (glistas da controlla, codex da cumportament, autodecleraziuns, decleraziun d'imparzialitad, etc.) duain ils posts d'acquisiziun prevegnir anc meglier a conflicts d'interess, cunvegnas da concurrenza scumandadas e corrupziun. Per quest intent vegn il DIEM a metter a disposiziun a las vischnancas sco er a las ulteriuras incumbensadras ed als ulteriurs incumbensaders dal plaun public ils instruments d'execuziun gia implementads tar l'administraziun chantunala che ston anc vegnir perfecziunads vinavant. Plinavant duain las personas responsablas per las acquisiziuns vegnir sensibilisadas per quests temas impurtants en il rom dal program da scolaziun e perfecziunament dal Chantun. Ils ultims onns han gia gù lieu occurrenzas d'infurmaziun correspundentas per tut las vischnancas grischunas (tranter auter ensemen cun la CUMCO).

Ad in'ulteriura professiunalisaziun da la furmaziun en il sector da las acquisiziuns publicas duess plinavant contribuir l'examen professiunal «spezialist/a d'acquisiziuns publicas cun certificat federal» lantschà da la Confederaziun e dals chantuns (Cuminanza d'interess per diploms federals en il sector da las acquisiziuns publicas IAöB). Il chantun Grischun è commember da questa uniun e represchentà en la suprastanza sco er en la cumissiun per la garanzia da la qualitat. En il rom dal profil professiunal modularisà emprendan las studentas ed ils students tar instituts da furmaziun accreditads vastas cumpetenzas per exequir a moda correcta ed effizienta ils process d'acquisiziun. In modul parzial da la furmaziun sa deditgescha al tema da la compliance (identifitgar ed evitar in cumportament cunter las reglas, sensibilisaziun en il sector da l'imparzialitad e da las reglas da l'anticorruptiun). Ils emprims examens han lieu quest atun.

Tenor il sboz da la decisiun da participaziun ch'ins chatta medemamain en ils documents da consultaziun vegn la regenza autorisada, en cas ch'il Grischun sa participescha a la nova CIAP, da ratifitgar adattaziuns posteriuras da la CIAP – uschenavant ch'ellas èn main impurtantas – e da far cun auters chantuns e stadis vischins cunvegnas da dretg reciproc. Gia la decisiun da participaziun a la CIAP 2001 ha cuntegnì questa clausula d'autorisaziun. Plinavant po ella abolir la decisiun dal chantun Grischun da participar a la CIAP 2001, sche tut ils chantuns sa participeschan a la CIAP 2019.

9.9 Ina buna legislaziun

Il project da legislaziun preschent realisescha ils princips da la necessitad, subsidiaridad e flexibilitad. Il sboz preschent da la LItCIAP tegna consequentamain quint da las prescripziuns che la

regenza ha concludì per la legislaziun (cf. conclus da la regenza dals 16 da november 2010, nr. 1070).

9.10 Midadas en in auter relasch

En las novas prescripziuns dal dretg da las acquisiziuns vegn duvrà consequentamain la terminologia «sector da las acquisiziun publicas» per quest sector dal dretg public. Las noziuns «fatgs da submissiun» u «dretg da submissiun» na chatt'ins betg pli. Correspundentamain duain las novas noziuns vegnir duvradas en il senn d'ina cumplettaziun formala er en la Lescha davart la Cassa da pensiun dal Grischun (LCPG; DG 170.450) sco er en la Lescha davart l'Assicuranza d'edifizis dal chantun Grischun (DG 830.100). Midadas materialas na vegnan betg fatgas.

9.11 L'aboliziun dal dretg vertent

La participaziun dal chantun Grischun a la CIAP 2019 ed il relasch da la nova LitCIAP han per consequenza l'aboliziun da la Lsub vertenta (DG 803.300), da la decisiun da participaziun dal Grischun a la CIAP 2001 (DG 803.500) e da la CIAP 2001 (DG 803.510) en la collecziun da leschas sistematica dal chantun Grischun.

9.12 Effects finansials e persunals

L'armonisaziun dal reglament da las acquisiziuns naziunalas ha avantatgs er sin stgalim chantunal e communal. Ins spetga effects positivs da l'adattaziun legala aspirada d'ina vart sin la relaziun tranter la Confederaziun ed ils chantuns e da l'autra vart er sin la relaziun tranter ils chantuns e las vischnancas, uschespert che la CIAP 2019 è entrada en vigur. Ils motivs èn per exempel ina giurisdicziun pli unifurma, il barat d'experienceschas, projects comunabels, meds d'agid e d'instrucziun sumegliants sco era scolaziuns e perfecziunaments armonisads.

Ils principals d'acquisiziun, ils decurs da las surdadas e l'organisaziun dal sector da las acquisiziuns publicas restan malgrà tut per gronda part tuttina. La revisiun vegn ad avair effects finansials minimals per scolar posts chantunals e comunals e per metter a disposiziun meds d'agid, quels duessan dentant esser da dumagnar cun ils meds avant maun. A media e lunga vista vegnan las midadas da la cunvegna però a chaschunar effects monetars survesaivels. La flexibilisaziun da la procedura da surdada, sco per exempel l'introducziun da novs instruments d'acquisiziun, po da l'autra vart chaschunar custs. Cunquai ch'i sa tracta per gronda part da disposiziuns facultativas, decida mintga post d'acquisiziun individualmain, schebain e co ch'el vul realisar las disposiziuns. Ils custs che resultan da la revisiun (p.ex. en connex cun l'impurtanza pli gronda d'aspects da qualidad e da persistenza) dependan uschia fermamain da l'execuziun concreta e n'èn damai betg quantifitgabels exactamain. En quel connex èsi dentant da far attent al fatg che acquisiziuns bain pli charas, ma da meglra qualidad, fan sur l'entira durada da vita savens ina bler meglra figura. I po pia er avair avantatgs finansials da resguardar pli fitg ils custs da gestiun ed ils custs dal ciclus vital.

Cun il mussavia cuminaivel davart las acquisiziuns da la Confederaziun, ils chantuns e las vischnancas ch'è avant maun a partir da l'atun 2021, duai vegnir cuntinuà cun las stentas d'armonisaziun er en la fasa da l'execuziun. A medem temp duain ils posts d'acquisiziun vegnir preparads per la nova cultura da surdada e per il sector da las acquisiziuns concepì a moda pli flexibla. Cun metter a disposiziun quest mussavia duai la nova legislaziun da surdada vegnir tractada a moda unifurma sche pussaivel sin tut ils plauns statals, uschia che vegnan a la fin dals quints impundids a moda optimala e persistente daners publics per incumbensas statalas. Sco gia tar la redacziun da la CIAP 2019 fa il chantun Grischun era part da la gruppa da lavur

correspondenta ch'elavura il mussavia cuminaivel davart las acquisiziuns e fa valair ils interess da posts d'acquisiziun chantunals e communal.

Cun l'armonisaziun naziunala dal dretg da las acquisiziuns publicas vegn tegnì quint d'ina pretensiun da l'economia ch'exista gia daditg. En il proxim futur na vegnan offerentas ed offerents betg pli confruntadas resp. confruntads cun perscripziuns d'acquisiziun che sa differenzieschan tut tenor regiun, mabain pon sa fidar en l'entir martgà naziunal svizzer d'in dretg da las acquisiziuns per gronda part unifitgà. Quai duess avair per consequenza ina clera simplificaziun ed uschia era respargns da custs per las offerentas ed ils offerents. L'utilisaziun optimada, la trasparenza e la segirezza giuridica empermettan medemamain in potenzial da spargn.

Cun la participaziun a la CIAP 2019 s'avran ultra da quai novs martgads a las offerentas svizras ed als offerents svizzers. Grazia al rinforzament general da l'innovaziun, la persistenza e la concorrenza da la qualitat vegnan las interpresas pitschnas e mesaunas svizras a pudair far valair plitost anc meglier lur fermezzas. Però gia oz vegn surdada mo ina fitg pitschna procentuala (2018: ca. 2 pertschient) da las incumbensas dal chantun Grischun ad interpresas cun sedia a l'exteriur. Plinavant sa tracti en quel cas savens da prestaziuns spezialas che offerentas indigenas u offerents indigens na porschan gnanc.

Cun la participaziun a la CIAP 2019 e las adattaziuns legislativas correspondentas na resulta la finala betg ina chargia administrativa supplementara considerabla per il mastergn e commerzi. Il cuntrari, l'unificaziun da las reglamentaziuns en connex cun las acquisiziuns publicas en Svizra reducescha – sco descrit survast – las chargias administrativas per las interpresas. Grazia a models unifitgads, profils standardisads d'offerentas e d'offerents, avis automatics davart publicaziuns per offerentas ed offerents, etc. vegn il diever pli stedi da meds d'agid technologic ed il diever prescrit da nov da la plattafurma d'internet comunabla per acquisiziuns publicas da la Confederaziun e dals chantuns (simap.ch) ad avair per consequenza ch'ils custs da transacziun resp. da las offertas globalas sa reduceschan.